

三天內解經卷上

滿八

三天 弟子 徐氏撰

夫人生體上稟乎天下象乎地日月則有幽明之分寒暑則有生殺之氣雷電則有出入之期風雨則有動靜之節人則有賢愚之質善惡之性剛柔之氣壽夭之命貴賤之位尊卑之序吉凶之機窮遠之期天地無人則不立人無天地則不生天地無人譬如人腹中無神形則不立有神無形神則無主故立之者天行之者道人性命神同混而為一故天地人三才成德為萬物之宗天不可不養生地不可不長物人不可不攝氣而養生也故天運玄元則有物化之變地非黃裳而有風震之災人背至道故有爛零之傷精氣浮於上而衆精流於下上下相貫影響相由人事錯亂於下則災應滅算在上則日月物蝕星辰倒錯皆由人事不正以致斯變今下古民人年命天橫尸骨狼藉不終年壽皆由所修失本婚姻非類混氣亂濁信邪廢真本道乖錯群愚紛紜莫知禍之所由或求殺六畜禱

請虛無謠歌鼓舞酒肉是求求生反死邪道使然頭顱播足事不相由祈請乖越以致滅軀天此年命誠可痛哉今撰集三天要解以示未悟可謹而秘之勿妄輕傳傳非其人殃沈子孫道源本起出於無先漢津鴻濛無有

所因虛生自然變化生成道德丈人者生於元氣之先是道中之尊故為道德丈人也因此而有太清玄元無上三天無極大道太上老君太上丈人天帝君九老仙都君九氣丈人等百千萬重道氣千二百官君太清玉陛下今世人上章書太清正謂此諸天真也從此之後幽冥之中生乎空洞空洞之中生乎太無太無變化玄氣元氣始氣三氣混沌相因而化生玄妙玉女玉女生後混氣凝結化生老子從玄妙玉女左腋而生生而白首故號為老子老子者老君也變化成氣天地人物故輪轉而化生鍊其形氣老君布散玄元始氣清濁不分混沌狀如雞子中黃因而分散玄氣清濁上昇為天始氣濃濁凝下為地元氣輕微通流為水日月星辰於此列布老

君因冲和氣化為九國置九人三男六女至伏羲女媧時各作姓名因出三道以教天民中國陽氣純正使奉無為大道外胡國八十一域陰氣強盛使奉佛道禁誡甚嚴以抑陰氣越越陰陽氣薄使奉清約大道此時六天治興三道修行老子帝帝出為國師伏羲時號為鬱華子祝融時號為廣壽子神農時號為大成子黃帝時號為廣成子顓頊時號為赤精子帝嚳時號為錄圖子帝堯時再出號務成子帝舜時號為壽子夏禹時號為真行子殷湯時號則子變化無常或姓李名弘字九陽或名稱字伯陽或名中字伯光或名重字子文或名宅字伯長或名元字伯始或名顯字元生或名德字伯文或一日九變或二十四變千變萬化隨世沈浮不可勝載至殷武丁時又反胎於李母在胎中誦經八十年剖左腋而生生而白首又號為老子今世人有三台經者是老子於胎中所誦者也反胎於李母者自以空虚身化作李母之形還以自胞非實有李母也世人不知謂老子

託胎於李母其實不然也至周幽王時老子知周祚當衰被髮佯狂辭周而去至關乘青牛車與尹喜相遇授喜上下中經一卷五千文二卷合三卷尹喜受此書其道得成道眼見西國胡人強梁難化因與尹喜共西入蜀賓國神變彌加大人化伏胡王為作佛經六十四萬言王舉國皆奉事此國去漢國四萬里蜀賓國土並順從大法老子又西入天竺國去蜀賓國又四萬里國王妃名清妙晝寢老子遂令尹喜乘白象化為黃雀飛入清妙口中狀如流星後年四月八日割右脇而生墜地而行七步舉右手指天而吟天上天下唯我為尊三界皆苦何可樂焉生便精苦即為佛身佛道於此而更與焉下古偕薄妖惡轉與酌祭巫鬼真偽不分太上於瑯琊以太平道經付于吉蜀郡李微等使助六天檢正邪氣微等復不能使六天氣正反至漢世群邪滋盛六天氣勃三道交錯癘氣縱橫醫巫滋彰皆棄真從偽絃歌鼓舞烹殺六畜酌祭邪鬼天民夭橫暴死狼藉太上遣真人及

王方平東方朔欲輔助漢世使遊觀漢國者視人情漢帝不信以為妖惑是故漢室衰破王莽執治劉氏漢帝乃是龍精之子大聖遺體應傳二十四君四百餘年帝胤難絕故令光武中興其間中絕帝業者皆由不信真正無有輔翼故群妖亂作改於鬼官自天地開闢乃有蓬夷羌蠻戎狄為中國之離落婚姻嫁娶各正其類奉事至道各專其真不使雜錯自從漢光武之後世俗漸衰人鬼交錯光武之子漢明帝者自言夢見大人長一丈餘體作金色群臣解夢言是佛真而遣人入西國寫取佛經因作佛圖塔寺遂布流中國三道交錯於是人民雜亂中外相混各有攸尚或信邪廢真禱祠鬼神人事越錯於下天氣物亂在上致天氣混濁人民失其本真太上以漢順帝時選擇中使平正六天之治分別真偽顯明上三天之氣以漢安元年年壬午歲五月一日老君於蜀郡渠亭山石室中與道士張道陵將詣崑崙大治新出太上太上謂世人不畏真正而畏邪鬼因自號為新出老

君即拜張為太玄都正一平氣三天之師付張正一明威之道新出老君之制罷廢六天三道時事平正三天洗除浮華納朴還真承使太上真經制科律積一十六年到永壽三年歲在丁酉與漢帝朝臣以白馬血為盟丹書鐵券為信與天地水三官太歲將軍共約永用三天正法不得禁固天民民不妄淫祀他鬼神使鬼不飲食師不受錢不得淫盜治病療疾不得飲酒食肉民人唯聽五臘吉日祠家親宗祖父母二月八月祠祀社竈自非三天正法諸天真道皆為故氣疾病者但令從年七歲有識以來首謝所犯罪過立諸晚儀章符救療久病困疾醫所不能治者歸首則差立二十四治置男女官祭酒統領三天正法化民受戶以五斗米為信化民百萬戶人未如雲制作科條章文萬通付于孫傳世為國師法事悉定人鬼安帖張遂白日昇天親受天師之任也天師之子張衡孫張魯夫婦俱尸解昇天故有三師并夫人自從三師昇度之後雜治祭酒傳授道法受者皆應

跪受經書還則拜送使必是三天正法人多不爾者趣得一卷經書便言是道經更相傳付或是六天故事致有錯亂承用彌久至今難可分別天師受太上正一盟威之道三天正法付子孫傳為國師謂當終於無窮豈有雜錯從來未幾而今六天故事漸漸雜錯師胤微弱百姓雜治祭酒互奉異法皆言是真正將多謬哉今有奉五斗米道者又有奉無為播花之道及佛道此皆是六天故事悉已被廢又有奉清水道者亦非正法云天師有奴不知書注難以文化天師應當昇天慈其敬心勅一井水給其使用治病瘵疾不應雜用澡洗飲食承此井水治病無不愈者手下立勅奴後歸形太陰井水枯竭天師以此水給奴身後人不解遂相承奉事者自謂清水之道其清明求願之日無有道屋厨覆章符脫儀惟向一甕清水而燒香禮拜謂道在水

聖人不死世人與未合命人無未殺則應餓死以其所珍奉上幽冥非欲須此米也漢高帝是龍精之子起於泗水亭吏而徑登帝業至文帝時老子降於河之上因號為河上公文帝命駕往問道焉老子授以道德五千言上下篇而去漢武帝欲學上道飛仙之法太上又遣東方朔輔助漢治武帝又不知朔是真人而為吏民令不異於凡人西王母上元夫人皆輪駕降於武帝欲成其道武帝不能開悟仰感靈澤棄蕩穢濁而貪世榮殺伐不止三官有血罪相牽被駭告寬稱訴鬼官又情欲不絕道遂不成歸形太陰至光武時與王莽爭治有黃河之難命危絲髮太上立化以助光武六月盛暑使河水生冰得度軍馬以濟其難漢祚天授應圖甘露降庭真人駕御神鳳來儀日迴影再中三足鳥九尾狐靈瑞鳥煥來聖輔翼正道助之自光武之後漢世漸衰太上怒之故取張良女孫道陵顯明道氣以助漢世使作洛北却山立大法帝王公臣以下莫不歸宗當此之時正氣還布漢

世前後帝王凡四百二十五年之中百姓民人得道者甚多漢室驕豪息慢不能昇玄故民人得之天師三世夫妻六人為三師之任茅君兄弟三人為司命之任自王長趙昇散仙之徒乃有百數非可悉名劉氏之胤有道之體絕而更續天授應圖中歡靈瑞二十二璧黃金一甕以證本姓九尾狐至靈寶出世甘露降庭三角牛到六鍾靈形巨獸雙象來儀人中而食房廟之祇一皆罷廢治正以道蕩除故氣此豈非太上之信乎宋帝劉氏是漢之苗胄恒使與道結緣宋國有道多矣漢時已有前漢學士不可不動之哉蓋三道同根而其支者無為大道清約大道佛道此三道同是太上老君之法而教化不同大歸於真道老子主生化釋迦主死化故老子剖左腋而生主左左為陽氣主青宮生錄釋迦剖右腋而生主右右為陰氣主黑宮死錄是以老子釋迦教化左右法異左化則隨左宮生氣使舉形飛仙右化則隨右宮死氣使滅度更生法服悉黑使者黑衣以法陰氣入於黑

薄也太上作此三道教化法雖殊塗終歸道真無有異也但人受元氣以得成形方復經壞受陰化輪轉自為難耳右化雖不及左宮速易輪轉歸真亦為善乎所以言右不如左者經言真道好生而惡殺長生者道也死壞者非道也死王乃不如生鼠故聖人教化使民慈心於衆生者可貴也夫有心者可熟祭五千文此經皆使守道長存不有生死道之宗本在乎斯經也

三天內解經卷上

三天內解經卷下

三天弟子徐氏撰

老子教化唯使守其根固其本人皆由道氣而生失道氣則死故使思真念道堅固根本不失其源則可長生不死經云百尺之臺事由下基正此之謂也道氣至微不可得見不可得聞迎之無前追之無後包含六合覆載天地德尊上皇功高二儀神明之君敬之則有福慢之則有凶故不可得而臣也福者亦非道祐之使得福凶者亦非道伐之使得凶唯道無親適人所為善惡之報應之若響焉凶則凶為吉則吉隨人所行耳道若有親疎可得彼此者得道之人則應以道上其父母遺其妻子奉獻其君不能得如此者則道在己身不由他人道者無也一切之物皆從無生有者則以無為本經云無者不知誰之子強字之曰道有者終則歸無能察無者則忘其身忘身者一切之物都盡忘之忘之者是不愛物既不愛物唯無是愛無以養見不以身為身悠悠吾子處有無之間不有愛患也

所謂形無形色無色味無味聲無聲道常在無人不知故老君經云吾所以有大患者為吾有身及吾無身吾有何患此之謂也深哉畢矣是知古始還朴及真復上古之始無則與道合同有形而無體故真人能存能亡承虛而行日中無影皆是無身身與無合故無有體影也故經云學道有家有身有心有此三者則貪欲不滅妬害不除神真高遊思念無感衆魔不伏可謂有有竟不有無無無不容恬然無為不有辭辯似頑似鄙不生不死無有復反此之妙哉深也畢矣夫為學道莫先乎齋外則不染塵垢內則五藏清虛降真致神與道合居能修長齋者則合道真不犯禁戒也故天師遺教為學不修齋直冥冥如夜行不持火燭此齋直應是學道之首夫欲啓靈告冥建立齋直者宜先散齋必使宿食臭腥消除肌體清潔無有玷穢然後可得入齋不爾徒加洗沐臭穢在肌膚之內湯水亦不能除自天臺公家祠祀靈廟猶尚先加散齋而况真道求靈降者乎余每見今世俗祭